

# KERATAN AKHBAR

TARIKH : 4 OGOS 2023  
AKHBAR : BERITA HARIAN  
MUKA SURAT : 14

## Kerangka ekonomi diperkenal perkukuh pelaburan EU-Malaysia

# Kerangka ekonomi diperkenal perkukuh pelaburan EU-Malaysia

**EUROCHAM Malaysia** sifatkan kerajaan komited bina negara lebih baik

Oleh Mahanum Abdul Aziz  
mahanum\_aziz@bh.com.my

**Kuala Lumpur:** EUROCHAM Malaysia berharap Ekonomi MADANI: Memperkasakan Rakyat akan meningkatkan lagi pelaburan dan mengukuhkan hubungan ekonomi antara Kesatuan Eropah (EU) dan Malaysia.

Secara keseluruhannya, EUROCHAM Malaysia menyifatkan Ekonomi MADANI adalah komitmen kerajaan Malaysia untuk menyampaikan visi dengan kerangka ekonomi itu membentangkan pelan hala tuju yang komprehensif dan bercita-cita tinggi untuk membina Malaysia yang lebih baik, memupuk perpaduan, kemakmuran,

serta kemajuan untuk generasi masa depan.

"EUROCHAM Malaysia berharap rancangan ekonomi ini meningkatkan lebih banyak pelaburan dan mengukuhkan hubungan ekonomi antara EU dan Malaysia," kata dewan perniagaan itu.

Ekonomi MADANI dilancarkan pada 27 Julai lalu, sebagai pelan strategik oleh Perdana Menteri, Datuk Seri Anwar Ibrahim, bertujuan untuk menjadikan Malaysia yang lebih baik melalui usaha kolektif.

EUROCHAM Malaysia berkata, pelan ekonomi itu mencerminkan perjalanan ekonomi Malaysia yang luar biasa yang mana pertumbuhan masa lalu sudah memberi kesan positif kepada kehidupan rakyat Malaysia, menghasilkan peningkatan kesihatan, pendidikan dan transformasi ekonomi daripada pertanian kepada pembuatan dan perkhidmatan.

Ia berkata, walaupun pencapaian masa lalu, rancangan itu mengiktiraf kemunculan cabaran baharu dan kritikal, termasuk kemerosotan tadbir urus, ekonomi yang dipaau domestik, baha-



gian pendapatan pekerja yang rendah, gaji median dan purata, kadar penyertaan tenaga kerja wanita, pengumpulan hutang negara, penurunan pelaburan dan daya saing global.

### Visi ekonomi baharu

Katanya, bagi menangani cabaran ini dan menetapkan visi ekonomi baharu, Ekonomi MADANI berpaksikan nilai MADANI iaitu kelestarian, penjagaan, penghormatan, inovasi, kemakmuran dan kepercayaan.

"Ia memperkenalkan dua komponen penting: 'Menaikkan Siling' dan 'Menaikkan Lantai', dengan yang pertama bertujuan menyusun semula dan meningkatkan ekonomi Malaysia dengan menggalakkan serantau, daya saing, pendigitalan dan pertumbuhan hijau.

"Ini termasuk mengukuhkan firma dalam semua saiz, menyokong perniagaan mikro dan tempatan, memastikan keselamatan makanan dan meletakkan Malaysia sebagai destinasi pelaburan yang berdaya saing di peringkat global," katanya.

EUROCHAM Malaysia berkata, komponen 'Menaikkan Lantai' pula memperjuangkan keadilan sosial, kesaksamaan dan perlindungan sosial untuk semua rakyat Malaysia.

Dewan perniagaan itu berkata, ia membabitkan menggalakkan peningkatan mobiliti sosial, memantapkan liputan perlindungan sosial, memastikan peluang yang saksama, menyediakan penjagaan kesihatan dan pendidikan sejagat dari kelahiran hingga dewasa, memperbaharui sistem pendidikan, menambah baik infrastruktur dan menjadikan rumah mampu milik boleh diakses oleh semua rakyat.

Ia berkata, bagi mengemudi transformasi ekonomi, rancangan berkenaan memerlukan pendekatan kolektif yang membabitkan rakyat, kerajaan dan industri.

"Pembaharuan sektor awam penting untuk kepastian, kecekapan dan pelaksanaan program pemantauan, berteraskan penanda aras global untuk pertumbuhan ekonomi dan daya saing, keberangkuman tenaga kerja, memerangi rasuah dan memastikan kemampuan fiskal," katanya.

EUROCHAM Malaysia berkata, pelan itu juga menekankan kepentingan tadbir urus dan penyampaian yang baik sebagai asas membina semula kepercayaan kalangan pemegang taruh.

Menurutnya, pembaharuan Parlimen, perundangan dan institusi, bersama-sama dengan menangani rasuah dan meningkatkan daya tahan masyarakat, di ketengahkan.

"Kerajaan berhasrat untuk meningkatkan kemampuan fiskal secara progresif melalui pembaharuan hasil dan perbelanjaan.

"Selain itu, penyampaian perkhidmatan awam yang tangkas dianggap penting untuk menyokong transformasi ekonomi dan menyesuaikan diri dengan ekonomi yang berkembang dan resilient global," katanya.